

閩侯縣志卷六十九

列傳五下

侯官

清

薛澧字子大一字弱園順治壬辰成進士改庶吉士授檢討典湖廣鄉試時朝廷將以翰苑臣儲大用選知吏事者十五人澧與焉授右江兵備道廣西按察司副使駐賓州右江本瘴地獞猺雜處民佩刀劍或戕官吏不可制郡邑城多傾圯澧至諭民解刀就業割俸錢修城垣建學宮立市肆集民貿易先是使者至有司檄民盛供張澧悉令裁去著爲令土官屬右江者三十六司相仇殺爲常凡時節謁見及報生男給劄世襲賄使者冀逞所欲澧卻不受民健訟或一家相構難澧諭以大義咸感悟去遷登萊海防兵備道山東布政使參議兼按察司副使駐登州會于七反禁旅雲集當需糧米數十萬石澧飛輓皆立辦曰巡牧地禁客兵之爲民擾者寇平師旋民有被俘者澧馳騎截道上解五百餘人以歸其有濫坐寇事未定讞自登州逮至省者約千人澧諭之曰爾無罪自詣卽得白矣皆行無一人逸者及按覆多解釋敘功加一級

蕭震字長源順治壬辰進士由順德推官行取擢湖廣道監察御史掌登聞鼓院管理章奏陞正四品京堂假歸召補山西道監察御史中途丁父艱歸服闋而耿精忠變作當逆萌未露時每公會震侃侃與耿相抗耿素憚之至是震乃陽受耿命而陰與張瑞午高天爵等密圖討賊謀洩耿縊死震南關下雍正四年督臣高其倬以其子蕭大爵狀奏白其事六年奉旨入忠臣廟諭祭建坊祀忠孝祠震生平遇事敢言爲文章上追史漢著有西臺奏議理刑末議巡鹺奏草洗冤錄蟄菴存稿道山紀略行世曾大升字惟佐順治甲午舉人初任廬州司理州判張某羅織大獄株累千人大升力雪其冤又讞決徐夢騏吳世忠等諸大案平反數十人調豐潤知縣曆撫州同知督漕江右漕運每艘給屯田八百畝撫州運獨用城

軍無田可屯而所費與他府等大升揭帖數十上請於大吏初議協濟再議灑帶三議捐資買田四議勸輸積穀五議請豁復言運丁困乏若不急爲之地將來逃亡不獨無田而且無軍請題明聽部議皆格不行遷武威知府改屯賦減鹽額補逋課清堡夫積弊一清秩滿擢寧夏副使武威士民請繪像建祠大升拒之抵寧夏開濬漢唐兩渠躬自監督措置積貯邊儲充實以勞卒於官著有四書集解大易啟蒙依隱堂詩文集

林必達字河子諸生改就武學順治丁酉舉於鄉任畢節守備捐俸建義學以教邑之子弟歷官秦晉皆著勞績後從奮威將軍王進寶討平吳三桂功遷孟壽遊擊致仕歸康熙三十五年北庫火延及越山六賢祠必達捐資重建鄉人卽祀於越山祠

鄭開極字肇修號幾亭順治辛丑進士選庶吉士授編修康熙八年典試雲南三十年以諭德督學浙江教諸生先行誼而後文章假歸家居四十載當事罕覩其面嘗薄遊江左值故人張玉書歸省墓相見歡甚時張方

閩侯縣志

六九

列傳五下

一一

秉鈞謂曰朝廷嚮用舊臣公當與吾偕行開極曰疎野之質豈足復供驅策笑飲盡歡而別爲人平易義有不可毅然形於詞色人敬憚之建宗祠置祭田以厚宗族時重修福建通志開極總其事然其書始終不傳又編黃道周九經解刊行有序年八十重宴鹿鳴卒子五輝焯燮煥烈輝焯煥康熙乙酉同舉於鄉輝字青黎南安教諭燮歲貢生煥字青巖知阜城縣烈字屏麓康熙辛卯副貢生

基燮子字葆真康熙甲午舉人父歿母性嚴毅爲弟所構不見容遂入都授內閣中書擢侍讀除戶部郎中出爲浙江鹽法道下車卻餽禮裁例費謂商人曰吾不以有餽而徇情亦不以無餽而苛法烏用此苞苴耶涖任三年蠹弊一清調金衢嚴道乞養歸爲弟立產業置祀田暇則與謝道承陳治滋黃任劉敬與輩結詩社

培字澍滋烈子一字蕙園爲郡諸生屢躋于鄉試乃罷去治生計以養父母而課其子獨嚴于居之西偏構眠雨亭爲諸子講業所偕游必績學能

文者

際熙字大純培子初爲諸生家甚貧日奔走營米以奉父母而妻子食薯蕷誠幼子勿洩鄰舍吳生死際熙高其行傾所有殯之又捐衣衣吳母乾隆丙子舉于鄉公車至吳聞同年生林芳春忽得狂疾詆謔諸大吏爲有司所逮禍且不測力護之事得解病亦尋愈遂後期不得與試都中人聞而高之文章高厲越俗其鄉舉同考官爲陽湖吳某得際熙文大喜以冠所得士及往見吳曰吾不必見生見文知必奇士也然已矣文品太峻終不可與庸愚爭福際熙屢絀於有司遂主漳州雲陽書院以終其詩文曰浩波集三卷弟際唐爲鐫行之

際唐字大章號雲門乾隆己丑成進士改庶吉士授編修直尙書房與雲南湖南鄉試督學山西累擢至內閣學士旋京奉命覆校盛京四庫全書祭告長白山邁疾歸閱數月卒際唐好讀書善鑒別古書畫工行楷書兼精篆隸

閩侯縣志

六九

列傳五下

二一

李燦字君發遠祖侗宋史有傳燦與兄尙斌鍵戶讀書尙斌籍生員仕終魏縣知縣燦以閩清籍登康熙丁未武進士十三年吳三桂反總督董衛國薦燦於安親王隸將軍石進麾下數立戰功從征建昌後營將縱兵擄民間子女燦爲親送還家凡四百餘人十五年春江西賊韓大任據吉安勢方張列舟師城外爲犄角燦夜半襲其水寨奪巨艦九以歸自是賊喪膽撤水柵兵明年三月城內賊急渡江燦同水師將沈甸侯截戰達旦斬獲無數大任棄城遁遂復吉安十七年以遊擊隨將軍林興珠用兵長沙大小數十戰皆捷賊走衡州追奔三百里進復寶慶次紫陽河鏖戰三晝夜大勝之有營卒奪人子女白將軍還十二人抵卒於法十九年五月雲南平以功累遷至貴州銅仁協副將擢福建金門總兵卒於銅仁子培坊皆知縣有政績

陳誥字禹夫康熙二十二年授廣東欽州營遊擊時亂後兵驕誥恩威並用謹斥堠時簡閱兵戢民懷尤敬禮儒生捐資修學宮擢廣西永寧參將

卒

蔣晟字景李康熙甲子舉人授澧陵令值鄰境多盜晟剔奸弊練鄉勇招徠安輯五載以治行擢刑部主事奉詔會同福建督撫綏海寇宣德威就撫者三百五十人遷員外郎復陳靖海六事轉尸部郎中管寶泉局弊竇一清戶部尙書趙申喬侍郎王原祁交舉清慎轉山西道御史巡視北城又視南城卒於官子迪字濬川丁酉舉人授博羅知縣移永安調南海皆有聲補天長知縣乾隆五年調崑山明於聽斷不事苛細濬湮河禁戕山掩骼理齒義學義倉橋梁道路次第修舉分校入闈積勞卒子奕湛字椒堂乾隆庚辰進士工詩文補福寧教授未任卒

林兆惠字子方號瀚海康熙己卯舉於鄉選授廣西貴縣知縣其地數經水旱兆惠至賑粥全活億萬人鄰境多來就食始教種麥人號林公麥時峒獍多出劫掠兆惠設望樓募鄉勇民賴以安護理潯州府事旋擢泗州同知州邇苗黎土番雜處臨之以誠番民皆悅攝理鎮安土府通判請建

閩侯縣志

六九

列傳五下

四

學准額八名雍正四年薦舉賢能召對擢廣東分巡廣南韶兵備道權藩臬及分巡肇高廉羅道皆正己率屬爲總督孔毓珣所器重有順德石埗村民怙惡不悛抗官拒捕總督議勦除檄兆惠察視父老聞兆惠至自縛巨魁以獻遂出榜安民民肖其像以祀嘗代墊貴縣民欠鹽課銀四千餘兩及莅監司揭示豁免邑人勒碑志其德有忌之者以采辦楠木不如式去官且催交代甚急兆惠傾產不敷總督知其貧以養廉銀奏准抵庫屬吏士民亦樂爲代完乾隆二年告病歸卒於家

鄭任鑰字惟啓號魚門康熙丙戌進士由庶常洊歷侍講在京邸與李光地孫嘉淦倡明理學引掖後進五十三年典試江西五十九年視學江南憲皇帝在潛邸稔其名雍正元年擢湖南布政使調湖北設木甌示闔屬軍民直言得失條陳利弊饋遺不戒而絕擢巡撫以前所訪利弊次第施行修江漢書院割俸錢以旌文行優者嘉魚等二十七州縣水災任鑰立請蠲賑全活無算權湖廣總督討湖南賊匪謝錄正等平之召入掌副都

御史旋往江南查倉穀尋被議回籍卒於杭州子念盥雍正甲辰舉人念榮乾隆庚午舉人武平學教諭遷邵武府教授

何勉字尙敏號止庵少貧去文就武隸督標驍勇有智謀康熙五十八年侯官土寇薛彥文嘯聚後洋總督滿保檄副將侯濬勦捕以勉從勉謂濬曰賊煽惑愚民附和者眾激之則難以撲滅散其黨羽則易擒也因曉諭各處凡在村者悉爲良民匿山谷者乃賊黨於是鄉民還家絡繹如織賊匿後壠離營十餘里忽聞礮聲濬驚曰賊至矣促防護勉曰此必欲遁而先發礮使我疑不敢進須急追之濬不信賊果遁高據仙殿巖勉選熟悉路徑者二十人往盡擒之議功授把總因佐總督滿保幕府浦城以計破梅溪隘內賊滿保撫其背曰爾之智謀古名將不過也明年臺匪朱一貴亂滿保駐廈門命勉從征時提督施世驃已擒朱一貴而朱黨王忠及劉富生猶未獲因命勉往捕生擒蘇清等焚其寨燔其積聚六十一年拔千總雍正元年勉復往南路搜捕遣降卒林慶往探盡得賊中情狀遂率眾

閩侯縣志

六九

列傳五下

五

入其寮擒劉富生焚其寮並獲王忠擢守備遷臺灣參將給世職准襲兩代拖沙喇哈番自朱一貴亂後南港骨宗與北港內眉社麻著同惡相濟四年總督高其倬檄臺灣道吳昌祚爲總統領兵進勦以勉佐之勉率奇兵二百擒獲骨宗父子復傳諭土官率番眾擒麻著赴軍前班師全臺以安明年入覲授湖廣洞庭協副將時貴州九股逆苗不法勉奉檄赴黔總兵霍昇分兵七路進勦勉功居最貴州提督哈元生命勉進兵攻取頭壘進克二壘羣苗逃入三壘在蓮花峰巔地險峻勉見峰之迤北皆草屋用火攻乘機進擊焚斬無餘黔地遂靖凱旋回楚擢雲南鶴麗總兵攝永北鎮乾隆元年調臨沅總兵三年調廣東左翼總兵四年移福建臺灣鎮總兵八年移南澳鎮總兵署福建水師提督十年以目疾乞休卒年七十二子思和襲雲騎尉累官至南澳鎮總兵

何逢禧字敬儒號念修乾隆十六年成進士授戶部主事勾稽錢穀如素習侍郎吉慶奉命按獄畿輔奏與俱行無錫稽某時亦領戶部謂吉慶曰

何君柱石才也補戶部廣東司主事己卯秋分校京闈庚辰京察一等引見加級上以知府膺表率任宜慎重其選不拘資格詔九卿及翰林之長舉所知逢禧以主事特奏記名四月除員外郎大學士傅恆時筦吏戶二部奏以逢禧授文選司掌印郎中胥吏無所緣爲奸癸未被劾解任讞成事頗白旋奉旨免置議其冬遂有江西鹽驛道之命抵任甫旬日擢湖南按察使楚俗刁悍刑名案牘繁多尤多告訐事逢禧始涖以嚴旋濟以寬吏民皆感服未幾超擢刑部右侍郎調吏部右侍郎逢禧再入中臺晉貳銓事熟習掌故昔時同事喜相慶而逢禧每惓惓以慎名器杜僥倖相勸勉以三十四年卒於位年僅四十有六平日事母能得歡心敏練本性成遇事輒一語剖斷是非嘗言諸葛武侯才須學也一語爲千古不磨之論又以人之有才如刀劍之有鋒鋦不用則鈍置但貴審所以用之而已強記過人每所經眼名章警句終身不忘爲詩則力闢嚴滄浪不關學之說不喜迂濶者高談心性而於淳厚質直之士又未嘗不心傾配齊氏子西

閩侯縣志

六九

列傳五下

六

泰有雋才戊戌進士翰林院編修

林龍章字彝雅號春藤又號旭台乾隆乙酉舉人大挑教諭截取直隸成安縣知縣調湖南龍山縣知縣白蓮教匪聚眾十餘萬由湖北來鳳縣起事戕來令龍山離來鳳僅十五里時官兵征苗未回急招募鄉勇六千人均不知紀律申軍法以統之盡一日力於城上架窩篷七十間晝豎旗夜明燈以爲疑兵命造梨根木礮壞屋燒炭以製火藥賊來攻城先一人颺衣襟以接鎗子我軍懼有妖術少卻龍章令旁持鎗者從頭面擊之連斃數人賊乃退走衣不解帶者六日兩戰皆捷率鄉勇渡河直抵來鳳並收復來鳳城擢永順府古丈坪撫民同知護理府事著有軍中紀事詩一卷春藤齋雜詩二卷孫振榮

振榮字見堯又字戟門晚號鈍叟道光壬午進士以知縣分發四川歷署綦江璧山資陽梓潼灌縣珙縣井研諸縣補中江每日黎明坐堂皇訟牒准駁必親批示至三鼓始退核判稿票時凡係牽連者悉爲刪去案關婦

女不輕傳到細故尤不輕用刑以爲笞杖之痕終身留玷中江積習子有室卽分爨不顧父母之養或留薄田數畝俾親自食其力有終年不省視者振槩治以不孝之罪閒有叔姪兄弟聚訟公庭詢其高曾名諱支派遠近懵無以應怫然曰祖則已忘族何能睦必先責之婦人有夫及子挺身赴訟者亦必呵止之蜀之嫠婦每擁故夫田宅以所生子女贅壻持家謂之坐產禁止之嘗以聚賭及私宰耕牛最害人心風俗痛懲之而盜源清文廟考棚演武廳咸經倡捐修建考童遂日盛井研中江卸篆均捐籌鉅欸發商以歲得子金爲兩邑士子賓興納卷之資邑爲川孔道往來差費皆捐廉措置絕不擾民民呼爲林婆婆咸豐末年乞退南旋囊澀如儒素惟書三萬卷官蜀三十年所治邑無刀兵厄民稱福吏閩撫李福泰設局刊本省通志延爲總校卒年八十三

陳春波字滋田乾隆庚子進士授湖北利川知縣利川處萬山中無城池嘉慶元年當陽縣邪教倡亂來鳳縣匪徒亦聚眾滋事春波奉檄至來鳳

閩侯縣志

六九

列傳五下

七

協同擒捕事竣歸利川諭所轄八十三保士民分段環築土城自捐千金造城樓又於四鄉隘口疊石爲壘募鄉壯防守二年奉節縣邪匪勾結縣民陳大朋等乘夜縱火春波率監生朱良益武生弁成煜領義兵擒逆首楊二璜等置之法又會施南協副將樊繼祖勦賊於石庄坪殲五六百人復約守備陳安信樹柵於縣西長堰塘率兵守之以當賊衝賊悉眾劫營相持一夜春波集鄉勇內外夾攻賊潰竄入崖硎蕪火焚之殲焉事聞加知府銜遇缺奏補八年調京山旋解組歸卒年八十一

陳蘭疇字贊兩一字綺石嘉慶丙辰進士改庶吉士散館授編修五年充實錄館纂修六年春充會試同考官秋充順天鄉試同考官九年補山東道監察御史巡視東城掌湖廣道權刑科掌印給事中攝街道廳事奏陳吏治首嚴考課今捐班分部學習人員三年期滿堂官徇情不甄別去留則冒濫者多而實心勤事者少必致部務廢弛銓次壅塞至外省佐雜人員閒住無資營求差遣上司勉徇所請名爲辦公實則滋擾州縣官不堪

酬應非刻剝小民卽侵虧庫項爲弊不少緝盜賊有司之責地方官恐千嚴議轉向事主苛求以至報竊甚於被竊胥役甚於盜賊均須嚴禁奉詔施行又以海盜猖獗提督李長庚久任水師請仍令其統兵進勦以專責成時長庚呈吏議詔從之海氛以靖十二年出爲廣西學政試桂林有婦人訴其子某生冤者究之得縣令受賄事奏褫令職至平樂家丁有藉端需索者重懲之自是所過地方秋毫無擾計試四府一州未竟而卒子松年道光辛巳舉人

陳夢熊一名大恕字章如號渭溪由行伍洊升千總嘉慶元年遊擊曾攀鶴在洋遇盜淹斃夢熊等救援不力經水師提督哈當阿奏參革職留任十年升臺灣水師右營守備十二年粵東洋匪朱瀆滋擾夥黨分竄閩省柑橘洋面夢熊隨提督張見升環攻轟斃賊首生擒賊匪八十餘名奪獲器械無算十三年正月在鷄母澳外洋追捕朱瀆分竄匪船射盜首方台立斃並擒獲夥匪二十九名三月超擢臺灣水師左營遊擊追勦艇匪於

閩侯縣志

六九

列傳五下

八

懸鐘外洋射倒數名賊目顴骨中礮傷仍擊沉盜船一獲盜船一生擒匪犯葉雨等三十名餘船遁回粵洋閏五月偕署總兵官周國泰等追勦蔡牽朱瀆幫船於宮仔等處洋面燒斃盜匪多名生擒賊目三十一名十四年崇武外洋有朱渥等匪船越竄夢熊偕定海守備官印方等擊沉盜船一撈獲盜犯九名生擒匪犯二十五名五月補銅山營參將六月署浙江温州鎮總兵官十五年署金門鎮總兵官先後拏獲盜首陳不洪天陳墨林助黃寶等並夥黨數百名奪獲船礮器械無數十七年升澎湖協副將二十年擢浙江黃巖鎮總兵官二十二年署温州鎮總兵官二十三年授定海鎮總兵官道光三年升廣東水師提督生平每戰所向披靡賊號爲大鵬六年以原品休致賞食全俸八年卒

蔡徵藩字价期號薇堂父以成字喬木號韶九嘉慶壬戌科進士改翰林院庶吉士散館以知縣用選授四川冕寧調署理番直隸同知會理州銅梁縣事皆有政聲徵藩其第四子道光二十一年成進士改庶吉士散館

授編修二十五年閩撫徐繼畬薦主臺灣崇文書院講席二十七年大考二等三十年充國史館協修官咸豐元年保送御史記名三年補江西道監察御史九月兼陝西道稽查中城十月轉掌四川道御史十一月陳奉軍務十二月巡視南城四年補吏科給事中四月補授廣東高廉道五年正月赴香山澳門查辦事件事竣赴任出巡電吳化石地方因廣西橫州永淳佃匪滋事奉檄調集兵勇馳赴靈山督辦軍務收復鄉村二百餘處戶口十萬餘人凱撤回署六年八月容縣失陷奉大府飭督師進勦十月收復河以南四里一百餘村賊竄渡河緣兵少經費支絀收兵回郡是年奏調雷瓊兵備道海疆要缺自審病後性情褊急爰更號韋堂七年高郡春雨連綿溪河漲溢廬舍田園傷損殆遍爰捐廉督屬妥爲撫恤一面招商採糴隣米以平市價入夏溽暑鬱蒸疾甚自晉省呈准開缺回籍八年正月驟聞羊城夷務決裂地方塗炭力疾北上途次接粵省欽使奏調隨營差委總辦惠州軍需分局十二月委權糧儲道事並奏請坐補雷瓊道

閩侯縣志

六九

列傳五下

九

原缺九年八月赴任未幾卒

廖鴻荃初名金城字應禮號鈺夫嘉慶十四年與兄鴻藻同登進士以第二人及第鴻荃起家寒畯空所依傍專以寫作之工游歷清要累升至工部尚書經筵講官賜紫禁城騎馬道光元年丁內外艱回里家人議析箸讓產弗受俶裝入都睿皇帝嘉其謹慎可任大事朝廷有大徭役輒命往督辦辛丑督修盛京工程壬寅南河楊工漫口與協辦大學士敬徵同往履勘尋署漕河總督鴻荃主堵築漫口挽黃歸故道之法省費便民癸卯河決中牟復奉命督辦召對時面奏工務繁難請添派廷臣熟河務者與禮部尚書麟魁分駐東南二壩鴻荃駐西壩躬親督率晝夜無閒每奏進占西壩必多成數埽甲辰二月某日大工將蕝朔風驟起黃水暴漲衝刷埽眼蟄失東壩五占鴻荃會摺請罪不以西壩未蟄申辯也旣免歸日偕鄉中耆宿杯酒往來怡然有終身之意成皇帝崩赴闕叩送梓宮以四品京堂候補留纂實錄編輯兩年進呈四百七十六卷咸豐壬子冬以目眊

骯弱之疾由太常卿予告致仕賞還尙書銜時閩省上下游土匪蠢動力疾督辦團練厥後粵匪犯邊屢陷郡邑會同地方文武及各紳耆募丁壯聯鄉團編保甲籌賑糶省垣賴以安堵地方利弊所在必爲大府條陳得失嘗以軍營利器礮火爲先倡捐經費延松江舊帥余萬清監造槍礮千餘桿江西巡撫沈葆楨聞而來購攻勦甚爲得力生平凡總裁會試一典鄉試三分校京兆試三朝考閱卷殿試讀卷督學江蘇浙江門生半天下湘鄉會國藩卽戊戌所薦士也同治三年重宴鹿鳴特加太子少保銜卽於是年九月卒年八十有一

鴻藻字應祉號儀卿由編修出爲江西糧道以病乞歸隱於棋酒

林則徐字少穆一字元撫嘉慶十六年成進士改翰林院庶吉士派習國書十九年散館授編修二十一年充江西鄉試副考官二十四年充會試同考官雲南鄉試正考官二十五年授江南道監察御史時海盜張寶投誠累官至廣東副將至是復擢總兵疏請調西北邊缺以杜舊黨簧鼓之

閩侯縣志

六九

列傳五下

十

漸上躋其言京察一等授浙江杭嘉湖道於所屬海塘水利悉心求之攝運司釐革夙弊道光二年授江蘇淮海道未赴任三年遷江蘇按察使決獄平恕民稱林青天四年正月署布政使八月丁母憂其冬高堰十三堡決口洪湖水盡涸無以濟運五年奉旨赴南河督修隄工墨經從事工竣仍回籍六年四月命署兩淮鹽政以未終制堅辭七年五月授陝西按察使署布政使旋升江寧布政使父憂歸濬福州西湖十年正月服闋六月授湖北布政使尋調河南十一年七月調江寧十月擢河東河道總督則徐以不諳河務辭溫詔勉赴任河東承前人奢靡之後聞則徐至皆悚勵懼旦夕嚴劾則徐獨先以誠信許其滌舊染勉自新老成之士朝夕諮訪豫東黃河多至十數廳所儲歲料數千垛皆徒步抽驗其虛實繪全河形勢於壁孰夷孰險一覽而得十二年二月調江蘇巡撫三月奏請裁山東泉河通判六月抵巡撫任時方洊饑奏免逋糧籌振恤清各屬交代結京控諸獄初則徐任按察使時奉旨總辦三江水利其夏大水至初冬四鄉

猶巨浸紳士議挖劉河故道以洩上游諸水大吏難之則徐力主其議尋以憂去任經陶澍奏明孟瀆劉河分年籌辦至是孟瀆工竣則徐以劉河白茆河淤墊更甚接行開濬每坐小舟數往來河上察勤惰測深淺與役人相勞苦七月奏言江蘇錢漕倍於他省其中有緩有急有舊有新莫如專嚴於提新而暫緩於補舊先是則徐在江寧藩司任內以各屬水災建議倡捐煮賑資送留養收骸瘞棺捐衣勸糶養佃當牛借籽種禁燒鍋凡十二條經陶澍以聞至是事竣民頌大起撫吳前後凡五年自辛卯再大水壬辰癸巳相繼患澇漕事孔棘沿河閘壩及通倉交兌費益重旗丁倍其數取之州縣州縣倍其數徵之小民民既困災又困於浮勒有棄田以逃者漕務大壞十三年秋杪陰雨不止稻已刈復敗例定秋災不出九月則徐方擬以續被災荒例請緩而嚴旨誥責陶澍方督兩江亦躊躇未敢決則徐乃單銜密疏瀝陳江蘇連年錢漕之累小民之苦反覆數千言堅請緩徵上鑒其誠特允所請疏稿爭相傳鈔小民聞之皆嗟歎聚泣慶更

生則徐念漕政爲倉督漕督所主運道則轄之兩河臣東南有漕者六省督撫預其事非蘇撫一人能抗而吳民旦夕就斃終夜輾轉不能已乃倣周文襄酌劑公私田加耗減耗之法一時賢名滿天下兒童走卒婦人女子輒曰林公來生我矣至以所行政播諸歌謠十五年十一月署兩江總督十六年二月回巡撫任七月復署兩江總督擒斬巨盜吳黨運等數百置之法江北以安十七年正月擢湖廣總督時荆襄歲苦水患則徐抵任後大閱士伍徧歷楚南北籌江隄修防諸事宜七月奏籌襄陽等屬鹽務緝私章程如所議行十八年二月偕湖南巡撫錢寶琛奏籌辰沅道屬苗疆屯防各事宜下部議行兩淮鹽務江督主運楚督主銷往往議論不合則徐與陶澍相契於淮鹽之入楚者引爲己任疏陳整頓四月奏請湖南提督常駐辰州府扼要彈壓均允之未幾而禁煙之事起鴉片煙者產自印度爲英國屬埠明時入中國曰阿芙蓉備藥物而已乾嘉以來中國人嗜之其癮也沉痾終其身迨道光而吸食者殆徧各省出洋銀以數千萬

計鴻臚寺卿黃爵滋奏請嚴禁限一年六閱月革除逾限者死罪命下中外各大臣議奏決行則徐奏言鴉片流毒已甚非難於革癮而難於革心欲革玩法之心安得不立怵心之法遂擬章程六條一收繳煙具以絕饒根一各省於定議後出示分一年爲四限遞加罪名以免觀望一加重開館興販及製造煙具罪名勒限自首以截其流一失察處分先嚴於听近一著令地保甲長查起煙土煙膏煙具庇匿者罪同正犯一豫講審斷之法以杜流弊因繕呈戒煙經驗藥方數種尋奏湖南湖北拏獲煙販並收繳煙土煙膏煙具情形上甚嘉之命入覲十一月至召見十九次命頒給欽差大臣關防馳往廣東查辦海口事件水師咸歸節制則徐感上殊遇毅然成行而中外柄臣有忌沮之者京朝官故人子弟亦以邊釁爲慮十九年三月入粵卽會同廣督鄧廷楨嚴劾歷年底私之督標副將韓某以徇前督李鴻賓設巡船專查煙土委任韓弁乃得重賄縱庇之洋煙之橫實出此則徐籍其家貲累巨萬英官義律頗懾與廣府余保純洋商伍姓

培密布水師檄參將賴恩爵禦之九龍山碎其雙桅大船英船紛集礮彈如雨我軍以網紗障船就旁施礮斃其多人接仗踰五時英人死傷益眾遂巡遁八月復檄守備黃琮等偵夷船於潭仔洋面乘夷人方開礮亟擲火斗火礮焚其船敗走之義律因潛赴澳門倩他國人遞說帖求轉圜則徐以其言未可信奏請相機勦撫諭曰既有此番舉動若再示弱則大不可朕不慮爾等孟浪但慮卿等畏葸也尋義律雖自稱悔罪九月復乘閒糾兵船滋□水師提督關天培敗之穿鼻洋遂竄泊尖沙嘴則徐以其北有山梁曰官□可以俯而攻也令深溝固壘以待之英人果六犯官備皆受懲創然猶逗□外洋則徐復請勅下福建浙江江蘇各省撫嚴防海口如所請行時英船被□寄旋外洋勾引漁船蜚戶誘以重利希圖接濟銷售二十年正月則徐定計□毒攻毒令關天培密裝礮船雇漁蜚各戶教以出洋埋伏候夜深順風揚火焚□付夷舟匪船二十三隻延燒夷舟及海灘篷寮自是漢奸膽懾夷船接濟幾斷□□奏尖沙嘴爲夷船經由寄

泊之區又爲粵省東赴惠潮北趨閩浙要道請與官備兩處各建礮臺俾聲勢聯絡如所請行五月再焚夷船於磨刀外洋延燒匪艇十一隻篷寮九座六月暎夷改犯浙陷定海掠寧波浙撫烏爾恭額張皇入告京師大震訾議漸起則徐上疏自請治罪並密陳夷務不能中止因請戴罪赴浙隨營自効英人旋復構釁於粵則徐調集米艇火船築墩置礮於蓮花峰下爲關閘前山障蔽又以安南軋船專擊船底夷人所憚遣人求式仿造以備火攻七月親駐虎門督師水路夾攻轟傷夷船沉其三板數隻獲礮彈大小二百有奇八月再敗之龍穴洲船夷惶亂不能拒僅放空礮他船來援我軍轟斷其篷索不得進遂乘潮南竄奏捷未至而英人狡甚遽赴天津海口投書直督琦善訴冤抑琦善與則徐有隙遂密陳撫議上意爲動又惑於滿樞臣穆彰阿之言九月降諭交部嚴加議處尋部議革職命仍留廣東備差遣以琦善代則徐督粵十二月琦善許償兵費二百萬畀以香港英人要挾日甚虎門遂失入奏上震怒所謂廈門福州通商及給

還煙價均不准行飛調四川湖南貴州兵赴廣東諭琦善督同則徐妥爲辦理二十一年三月賞四品卿銜命赴浙江鎮海軍營協辦事務五月復革去卿銜遣戍伊犁七月河決開封大學士王鼎總理河務以則徐熟悉情形奏請赴工効力奉旨免遣戍襄辦東河河工二十二年工竣仍遣戍王鼎以死諫殮時懷中有遺摺數千言力保則徐具論和議非計穆彰阿啗喝鼎子匿不敢上天下憾之乃寄拏關中攜二子聰彝拱樞出塞二十四年伊犁將軍布彥泰奏請飭則徐勘辦伊犁開墾事宜則徐遂親歷庫車阿克蘇烏什和闐喀什噶爾葉爾羌及伊拉里克塔爾納沁等處縱橫三萬餘里計闢屯田三萬七千餘頃請酌給回子耕種並請改屯兵爲操防均如議行二十五年九月命回京以四五品京堂候補十一月賞三品頂戴署陝甘總督二十六年三月授陝西巡撫仍暫留甘肅偕陝甘總督布彥泰等辦理番案二十七年升雲貴總督時雲南漢回互鬪垂數十年焚殺幾無虛日則徐抵雲南適回民丁燦廷赴京疊控保山縣漢民沈振

閩侯縣志

六九

列傳五下

十四

達串謀誣害劫害無辜經地方官提犯鞫訊漢民遂糾眾奪犯燬官署劫獄囚搽殺回戶折瀾滄江橋道路以梗二十八年督兵赴勦簡精銳三千人以往先宣示曰但分良莠不分漢回途次聞趙州之彌渡有客回勾結土匪滋事遂就近移兵勦之誅其罪重者百數十人駐大理數月召漢回父老諭以恩信眾皆感畏復乘勢搜捕永昌順寧雲州姚州歷年拒捕戕官諸匪千餘名寘諸法奏入得旨加太子太保銜並賞戴花翎二十九年五月騰越廳卡外野夷滋擾則徐檄總兵拴住迤西道王發越率明光隘土守備左大雄勦平之六月因病請假七月復奏請開缺疏數上乃允之歸適英夷因廣東停其貿易不許入城改而之閩入省城住神光積翠二寺則徐率紳士倡議驅之慮其以礮船來海口恐喝數乘扁舟至虎門閩安諸海口閱視形勢函商疆吏與總督劉韻珂巡撫徐繼畬意見不合三十年顯皇帝嗣服下詔求賢五月大學士潘世恩尙書孫瑞珍杜受田交章薦則徐應詔命迅速來京聽候簡用九月以廣西匪首洪秀全稔亂特

命爲欽差大臣頒給關防馳赴廣西督勦則徐方卧疾聞命束裝星夜兼程十月命署廣西巡撫桂林土賊大小十數股聞之相約解散秀全謀遁入海廣督徐爲則徐年家子募驍健五千人爲一隊先期馳告則徐方爲申約束定規制十一月行次潮州疾大作日夜下數十次聞淮南改票鹽槌床曰楚中游手咸以鹽爲活一旦失生計禍自茲始矣後粵匪陷武昌鹽船水手數萬人爲賊前驅所言卒驗不二日遽薨詔晉贈太子太傅賜祭葬予諡文忠則徐身體不逾中人而嚴重如載華嶽眉目疏朗光奕奕出數步外能使人盡言而考訂詳審聞者駭服故人之事之如對神明如臨師保尤慎舉劾歷封圻十數省所薦不過數十人皆以才德致通顯爲時名臣而無一人貽物議其所擯斥尤少於舉薦奏牘中論屬吏優劣適如其分從無譽之過情而毀之過當者書具體歐陽詩出入白蘇子汝舟聰彝拱樞

汝舟道光戊戌成進士改翰林院庶吉士散館授編修則徐遣戍汝舟例

閩侯縣志

六九

列傳五下

十五

不得隨侍故以兩弟從則徐薨於軍服闋汝舟升侍講湖北巡撫胡林翼疏薦幫辦江南大營軍務未赴卒

聰彝字聽孫父戍伊犁則徐旋奉命勘辦開墾事宜歷庫車阿克蘇烏什等八城皆以聰彝從聰彝聞見日廣成西行日記道光三十年則徐卒於軍聰彝奉喪歸服闋應召入都引見以郡庠生賞舉人授內閣中書假旋道蘇州兩江總督留辦團練賑撫事宜擢員外郎胡林翼疏薦人才以聰彝名上聞同治元年左宗棠撫浙奏保聰彝堪任司道特授衢州府知府充閩浙總糧臺提調兩浙郡縣淪陷殆盡倚衢爲重鎮軍資咸仰給焉事平以功擢道員署浙江按察使錄囚多平反捕治嘉湖槍匪尤力匪首李世賢陷龍巖左宗棠檄大軍赴援聰彝請自海道濟師不旬日至遂以平賊改署杭嘉湖道督修海塘與工役共勞苦又委辦戴鎮兩汛缺口石塘工程前後凡五年搶辦險工朝夕露處寢以病濕移疾歸光緒三年浙撫梅啓照趣聰彝再出適舊疾復作因不起子賀峒鈞澤光緒乙酉舉人江

蘇知縣煒焜光緒戊子舉人燕愉附生湖北通判孫炳章光緒甲午進士翰林院編修福建鹽運使閩海關監督財政廳長

拱樞字心北父喪服闋由吏部帶領引見以縣學生賞舉人補內閣中書洊升刑部主事員外郎湖廣司郎中前後十餘年自主稿迄總辦秋審處傳古亭疑平反冤獄全活甚眾擢江南道監察御史巡視西城轉廣西道歷署兵科掌印給事中京畿道山西道河南道監察御史光緒元年拱樞以東方隱憂端在日本疏言日人步武歐西兵競而島蹙島蹙必思鬪兵競必思逞臺灣孤懸海外而我國海軍不足恃日一伸腳臺非吾有也請以重臣鎮之時國家方中興天下無事上下不甚警省嗣以京察一等簡放山西汾州府知府汾陽之田仰水於文峪文峪壅則汾田不可復治二縣民常構大訟拱樞到官持平決之用父則徐遺法條陳濬河事宜大府韙而行之汾田乃累歲大稔汾民每以腴田種粟嚴禁之時汾人謂土燥不宜桑無治蠶者拱樞曰詩云彼汾一方言采其桑汾固宜桑何棄之

閩侯縣志

六九

列傳五下

十六

令植桑數百萬本未幾以未疾告歸子毓良附生壽鼎同治庚午科舉人四川候補道岐鏡光緒乙酉科舉人陝西知縣孫煥霄光緒癸巳科舉人灝深光緒甲午科進士學部參議玉銘光緒乙未科進士翰林院庶吉士廣東知州駿庠附生步隨光緒癸卯科進士翰林院檢討國務院秘書長韓移光緒癸卯科舉人廣東知縣福建鹽運使

賀峒字訪西同治癸酉舉於鄉充官學教習以教職用改官同知保知府光緒七年至廣東充釐局提調省河六門緝私等差十年張之洞督兩廣辟總文案會法越戰事告竣保升道員十三年署南韶連道兼太平關監督於道署創設清訟局平反甚多煤窿工頭楊亞炳歐斃客民黃光高一案曲江知縣陳壇被朦不能直賀峒廉得其情寃遂白自是虐侍苦工之風以息次年兼攝韶州府篆建北江書院普及三屬時連州一帶民獠多械鬪賀峒謂辦法宜分良莠不分民獠親率練勇百名下連州漏夜飭弁拏匪首蕭三喜等置諸法凡兩造互殺人口按名對抵外其無可抵者每

名繳銀百兩作賠欸從寬免究又令猛練每朔望謁官具不敢生事及保路各結其討平殺人坪黃爪冲諸猛怙惡者尤爲其難厥後總全省營務處兼製造局署高廉道不及月調署雷瓊道兼瓊軍統領巡撫馬丕瑤薦之於朝復回粵總水陸師學堂兼水魚雷局旋改武備學堂嗣改省江蘇會辦江寧機器局吳淞埠工善後局尋總辦滬寧購地局蘇皖閩鐵路學堂卒於滬寓郵傳部奏請優恤贈太常寺卿銜著有味雪堂遺稿子源焞官知縣

李彥彬字則雅又字蘭屏號蘇樓唐成公椅之裔父鴻瑞傳在循吏彥彬道光癸未成進士選庶常充武英殿纂修改官刑部治爰書矜恤祥刑恆求法外意以活民母陳氏卒於京邸奉櫬南旋於西園荔水莊之東構春暉草廬以安靈寢復拓石畫園供父母遺像倡建侯官鄉賢祠奉述古陳公以下二十三人栗主祀之乙卯服闋將還朝會歲荒穀踴民大譁變彥彬出見當路請下令發倉穀以安民心民之鬩者始皆散去入都仍官刑

閩侯縣志

六九

列傳五下

十七

曹補山東四川清吏司主事總辦秋審處精通例案諳達政體部中章奏各稿多出其手好金石字畫收藏亦夥卒於道光丁酉年春秋僅四十有六所著有玉堂清課蘭亭年譜山谷年譜榕亭詩文集

李彥章字則文一字蘭卿守思恩日又自號榕園嘉慶辛未成進士以內閣中書用時大興翁方綱自命主持風雅後進咸樂從之遊彥章以所學贄號蘇齋入室弟子復偕謝啓昆吳嵩梁陳用光梁章鉅劉嗣綰顧莛程恩澤諸先生論文賦詩昕夕相切劘尋奏派覆勘實錄紅本詣館校讐多所釐訂乙亥補授中書實缺歷充文淵閣檢閱國史館分校撰擬進奉文字協辦侍讀丙子內閣保送軍機章京記名戊寅副歸安王以銜典江西鄉試十月丁父憂歸主興化興安書院壬午服闋補官旋直軍機癸未遷內閣侍讀乙酉二月京察一等記名以道府用旋保送御史亦記名七月簡放廣西思恩府知府丙戌蒞任自前明王文成公平定思田開通八寨功德在民郡人建陽明書院祠祀之歲久址廢彥章訪得城南榕園故址

乃捐俸興築所屬土司相率納寶錢助役落成於丁亥二月仍顏之曰陽明書院專課土官子弟及郡邑各學生以三月三日選三百三十三士而釋菜於榕園猺獐狗狝狝獠獠之民咸觀禮焉祀文成公於崇報堂祀道學五子於實學齋祀經學諸儒於實用齋又於院中分濂學洛學關學閩學鄭學許學古學詞學選學詩學爲十齋德性文藝經義史論道古通今象輿倉雅禮樂兵農知音讀律水利算學金石書畫爲十六軒而統於實學實用二齋蓋仿胡文定經義治事之意復於陽明書院外建闢西邕書院爲合郡童生肄業之區顏其堂曰正學親書朱子白鹿洞規於楣間分處多士於六齋二十四軒漢學宋學二齋附以周易尙書古詩三禮三傳通書定性經傳正蒙大全十軒閑存博約二齋附以聚仁和義明禮藏智履信博學審問慎思明辨篤行十軒小學舉業二齋附以游藝識字能賦學文四軒凡兩書院生童三百餘人又建義學一區因城西新濬惠泉卽以名其學而顏其堂曰正蒙此外如武緣縣有雙江義學賓州有瑯琊

義學士田州百色城有文同武成二義學皆爲籌穀息定規條如所以教書院者歲科兩試嚴密關防弊拔寒峻遷江十五所屯丁子孫悉許入試以世僕訐者斥之又建聚奎樓文江塔以培文運建琢玉亭鏡湖閣以祀鄉賢所爲風厲儒林者無所不至向學旣廣應試浸多郡試院在賓州屋久浸頽人浮於地調任慶遠時道過賓州相度策調而後行歸則試院告成昔之敷坐千二百人者後容至二千四百人郡中山多水少地瘠民勞彥章體察情形廣頒文告令各州縣土司徧諭農民因勢利導無水者爲田求水無田者就水開田又於陽明書院隙地先開稻田春播秋收爲民間倡一年之中武緣賓州上林遷江四州縣先後報開塘圳三百三十六報修壩四百三十新開塘地並援山頭地角例請免升科猶恐江上田高水低郡人難於架車水不適用因試用北方桔槔之制又遠僱匠人作龍骨釣桿二車教以踏轉遠近效而爲式郡祇一穫至是始試栽早稻歲獲豐收時大府檄議保甲團練事宜彥章議仿朱子所行之法行之全郡無

以命盜新案報者郡城向由土司修葺年久日圯工繁費鉅彥章令士民自赴估修不許吏胥派擾一年內城工遂完若夫培補山川流連觴咏在陽明書院則有合江臺畫屏山玉帶橋之勝在郡邑則有燕子巖聽泉亭小桃源印月潭合雲巖獨秀峰琴筑泉之勝創輯府志卽書院開局選高才生分任採訪收錄其編纂筆削皆出手裁戊子三月調署慶遠府事嘗捐俸獨修府學文廟以八十日葺工十月奉檄晉省權分守桂平梧鬱道兼鹽法道己丑調署潯州府事所爲安邊察吏教士親民者略加思恩慶遠而整理通省鹺綱鉤覈潯州廠稅尤所殫心丁母憂服闋補授江西吉安府知府行抵吳中則已升授江蘇常鎮通海道所官兼管關務及所屬各廳河務下車卽常駐關署除積弊屏陋規招客商革蠹吏度支會計旦夕必親出納均輸舉無遺算行部所至勘驗隄防稽查歲料必慎必勤癸巳權江蘇按察使事值蘇松諸郡恆雨爲災議蠲議賑外乃爲江南勸種早稻說又爲江南勸種再熟稻說爲兩淮鹽運使嘗葺邵伯埭伯應祠並於其側建三十六湖樓周覽湖山兼以熟籌水利在蘇州創建蘇文忠祠並復嘯軒故蹟構蘇亭於其中又於揚州蜀岡桃花庵旁建宋三公祠祀韓忠獻歐陽蘇兩文忠復於祠之西軒取漁洋山人詩話作載酒堂以所摹漁洋石帆詩意圖像其中又嘗建江山文選樓自選鎮江揚州二郡詩文丙申升授山東鹽運使兩大府以時方承修海艦督辦聞江兼疎濬練湖事體繁重乃合詞奏留一年報可遽以積勞病卒年僅四十有三所作詩古文四六數千首在廣西所刻者爲潤經堂自治官書思恩府新建書院義學事宜新編保甲事宜榕園文鈔榕園詩鈔榕園楹帖榕園證詞思江諭別詩存荷花生日詞皆編成帙梁章鉅爲廣西巡撫奏請入祀思恩潯州兩府名宦祠手所編纂有思恩府志思田方言思田草木狀榕園學矩西邕講授榕園識字編榕園辨韻編劉河志練湖志三十六湖志焦山志芍藥志蘇亭小志皆有成書未竟者如江淮文選揚州水利書鎮江水

利書揚關志增輯歷朝藝文韓忠獻公年譜

楊慶琛原名際春字廷元號雪椒嘉慶庚辰成進士觀政秋曹各部額外司員因補缺無期不常至署慶琛以練習法令自此始日從公不少倦一日雨甚泥淖沒踝尙書韓公桂齡退朝至部惟慶琛在詢以始末甚悉心大悅他日謂司曰明允篤誠如楊某者眞刑名官也遂命掌稿道光己丑補河南司主事庚寅升陝西司員外再升山東司郎中丁母憂服闋補廣東司郎中兩充律例館提調一任提牢甲午京察一等授安徽寧池太廣道丙申升湖南按察使己亥升山東布政使旋署巡撫兼署學政壬寅召補光祿寺卿癸卯二月致仕慶琛在比部久最長折獄山海關副都統爲佐領指控欽差大臣賽奏請以慶琛隨行卒能鉤鉅得實楚省瘠貧童而勻者徧道路慶琛檄所屬收養知州某立法最善卽下其法於郡縣全活無算山東巡撫託奉旨密保州縣十員時慶琛爲藩司託示以薦牘爭之曰濟寧牧徐宗幹循吏也胡未列名託卽爲補薦徐後任福建巡撫諡清惠祀名宦者也慶琛性喜吟詠旣歸田益游覽山川留題殆徧姬妾眾而

子孫多家計益窘而介節益堅劉韻珂來爲閩督舊僚也戚有業齧者求退乞一言願以千金爲壽慶琛怫然曰吾一言豈值千金然千金不能買吾一言也巡撫鄭祖琛延主講鼇峰書院以老辭徐宗幹延主鳳池書院亦堅辭時屢空久矣嘗公車過吳門聞賣女者哭甚哀出旅囊三十金贖還之資斧不給不計也嘗奉母張氏教月買魚鼈放生數十年如一日閩中無力之家多停柩不葬慶琛爲請於大府募欸伙葬由是四郊少暴露者同治甲子重宴鹿鳴賞加二品銜丁卯八月考終壽八十有五

林紱字湘颿一字鷗恬道光壬午成進士授刑部主事旋改郎中嘗將律例逐條推究前後平反疑獄不下數十百起歷隨欽差赴直隸河南山西山東四川等省審判案件留部十餘年出爲山東運河兵備道未到任改廣西右江兵備道歷任廣西湖北按察使在湖北時適民間有案京控派大臣查辦督撫以下皆褫職紱臨時代辦兩湖總督事某大臣素以賄聞紱無以饜其欲復命時詞連紱詔降三級遂以母老乞養歸嗣朝廷亦知

其枉復原官應召卒於途子三人長瀚浙江鹽大使次直次惠臻浙江於潛嵯縣知縣

直字子隅髫齡侍父京邸有詩名繼隨宦燕豫齊魯吳越湘桂諸省多領略名山大川勝概兵興以諸生從軍閩浙同治癸亥游粵十餘年以軍功奏保道銜分發廣東補用知府卒嘗集里中同輩創南社治詩著有壯懷堂初二集嶺南詩存

王有齡字英九號雪軒父燮以舉人官至甘肅平涼府知府有齡儻有奇氣不屑屑爲科舉之學入貲爲浙江鹽大使補浦東場署新昌縣事下車兩月卽斷結積案百餘起邑故多盜有齡曰此爲飢寒所迫耳因榜示通衢歸田者不問再犯者弗赦盜皆解散題升慈谿縣縣治杜白二湖北鄉糧田萬餘頃藉以灌溉歷署鄞縣鎮海仁和以在鎮海獲隣盜功以同知直隸州補用權湖州府癸丑二月粵寇由安慶陷金陵羽書狎至有齡併工修濬城濠以團練屬郡紳趙景賢自募精銳守四門故雖賊氛逼近

閩侯縣志

六九

列傳五下

二十一

而市肆晏然以督催漕運出力以知府用時杭屬新臨於昌各邑土匪竊發期與粵賊應率兵次第平之皖撫江忠源耳其名奏調赴營浙撫黃宗漢疏留不果行甲寅上海失守蕪湖亦踞於賊有齡扼太湖設巡船以守賊不敢犯乙卯調補杭州府兼護督糧道賊陷徽州益以江右股匪竄近三衢有齡籌兵籌餉內外兼防省垣乃得安堵丙辰兼署鹽運使旋護按察使篆冬補授雲南糧儲道巡撫晏端書奏留奉旨暫行留浙幫辦軍務丁巳升江蘇按察使並署布政使藩庫困於軍需度支竭蹶官紳設局勸捐各營帥與外府縣則設卡自爲籌備因緣爲奸有齡悉請停撤另擇要隘數處派員督辦歸藩庫收放江南大營賴以不匱戊午實授布政使時賊竄閩疆圍攻延建甚急有齡請總帥派周天受一軍馳援月餉由蘇籌撥兵至賊遁庚申二月賊襲杭垣踞之有齡偵知滿營未破思建裏外夾擊之計張玉良一軍適至蘇因促令赴援且以現銀十萬犒師張軍至奪城驟入滿營開壁掩擊遂克杭州悉如所策上亦微聞之適浙撫羅遵殿

死寇難乃以有齡代焉三月赴任先修濬城濠爲守禦計又假趙景賢令箭以重湖防浙省向以金陵大營爲長城故但嚴湖州以遮皖南初未籌及嘉興閏三月大營忽潰張國樑戰死丹陽蘇常並破浙乃大震張玉良師潰蘇州一日夜奔至杭浙西鼎沸有齡亟遣人持令箭止駐嘉興已而賊酋李世賢由金壇回撲嘉興陷之張玉良收潰卒萬二千人以圖恢復有齡爲籌餉精製器械六月賊糾大股竄安吉孝豐陷於潛臨安進踞餘杭直犯省城有齡督將弁與總兵劉季三迎擊破之斬獲無算劉軍乘勝追勦遂克餘臨兩城於潛富陽亦復張玉良之至嘉興也轟陷南門堞口潮勇通賊陣亂水師亦亂遂俱潰張玉良奔回杭州自是石門嘉善桐鄉相繼淪喪賊跟蹤直至省城有齡遣彭斯舉劉芳貴兩軍截擊仍退踞嘉興八月徽州之賊由淳安下陷嚴州省城戒嚴九月賊陷桐廬十月初旬新城臨安富陽俱陷劉季三劉芳貴皆戰歿二劉皆勇將自是浙無可恃之將矣賊踞臨富將窺省垣並圖寧紹有齡抽撥馬隊五百人疾走富陽

用火器掩襲之賊驚遁李世賢旋糾廣德大股二十餘萬眾趨撲省垣有齡親登陴督戰相持一夜次早賊分三路來攻我軍迎擊大破之李世賢退踞留下夜復分股銳進火光燭天有齡令各軍居前副都統傑純領旂兵爲中隊自率親軍繼進戰逾時賊陣稍卻有齡麾軍前傑純振臂大呼躍馬砍陣斬黃衣賊二名別軍復從後路抄入賊大敗我軍乘勝感之躡平留下賊壘並克餘杭十一月復克嚴州皖賊漸平而江右股匪復有入浙之謀乃調兵扼衢州及常山草門以固門戶賊屢犯常山不得逞遂由婺源陷江山參將林文察勇敢善戰遂克之辛酉正月命兼顧江蘇太湖軍務二月賊復入閩閩軍皆調回援林文察亦去兵力愈單三月賊入太湖並陷海鹽平湖於是嘉郡惟餘澈浦一城浙西與江蘇有輔車唇齒之勢蘇州陷後巡撫薛煥駐上海縣城平湖三泖通焉嘉興失正道雖梗而鹽平乍澈尙存軍書可由海寧繞道以達上海守鹽平之副將黃金友及乍浦滿營亦能苦戰卻敵故賊不能由嘉興竟撲平湖至是土匪導從他

徑旁襲黃金友陣亡杭滬之路乃斷其江右之賊長驅直下張玉良退紮嚴州各股賊既環迫省防而洞庭東山賊船數百艘復勾連新市股賊夾攻湖郡大勢岌岌有齡念客兵既不得力欲募湘勇數萬人自成一軍又念兵多餉絀省城乏穀後患堪虞議於通江門外夾築土城屬江以護糧道事未及行而浙東已殆乃延諸將入宴問孰往禦處州鎮文瑞江右援浙將也有齡待之素厚慷慨請行五月朔日次諸暨進紮金華之孝順街其時張玉良軍在蘭谿與民團鬪各傷斃千百人因沿江擄船下賊遂陷蘭谿而江路亦自是梗矣有齡復檄米興朝吳再升率軍爲文瑞後繼而孝順軍潰文瑞進守浦江賊圍之縋書告急檄提督饒廷選往援七月十四日至鄭義門前軍潰廷選復會鹽運使莊煥文等自處州來援之軍整隊並進五日行八十里八月初二日亦至鄭義門而潰又急令副將楊金榜往守諸暨營於城南莊張潰軍營於城東文瑞知無援衝圍出走浦江陷賊分路犯諸暨各鄉團起義殺賊約官軍會擊卒不敢應民團亦敗會

賊酋陸順德陷蕭山諸暨亦失而省城乃面面受敵矣當嘉興不守時上命前漕督邵燦爲團練大臣邵謝不敢任乃以命前副都御史王履謙履謙不知兵有齡以歸安令廖宗元屢保危城令守紹興又以寧紹台道張景渠來修守備莊煥文所部守城賊逼城團練盡散城陷宗元死之浙自杭滬隔絕衢處被擾金華告陷嚴州又失餉源一綫繫於寧紹二郡紹興失杭城孤危愈甚賊既得紹興十月朔日攻陷賣魚橋有齡日乘城督戰冀通江路賊趕築土城鑿眼置鎗以禦糧道遂絕張玉良親逼賊營血戰中礮陣亡城圍既久十一月兵食垂盡士卒終無變志有齡刺血作書四出乞援各路統帥握重兵相環卒無一旅至者前託道員李元度募安越軍六千人久已抵浙亦遲徊衢州不克來日夜登城樓望援師兩目盡腫以針刺之血出始能視初十以後城外各營盡陷有齡與將軍瑞昌相嚮哭遂草遺疏遣親軍冒重圍至上海託蘇撫代騰奏延至二十八日守兵已不食數日漸踣已刻賊由各門紛紛梯城入城遂陷有齡下城至清軍

橋驛館從容死之年五十二歲事聞予謚壯愍給騎都尉世職子喬雲騎都尉浙江補用道卿雲咸豐己未舉人刑部郎中湖南知府見三與兄同榜舉人戶部郎中候選知府瑞雲茗雲均六部候選郎中

郭栢蔭字遠堂父階三嘉慶丙子舉人歷任連城同安教諭親見五子登科甲長栢心字新甫道光壬辰舉人咸豐癸丑任漳浦教諭土寇黃德美破漳州栢心領民殺賊困城中七閱月後終南靖教諭著有琴學尊聞次卽栢蔭又次栢蔚道光甲午舉人又次栢蒼傳在文苑又次栢薌咸豐辛亥舉人栢蔭號遠堂道光十二年成進士改翰林院庶吉士散館授編修十六年記名以御史用十七年補浙江道監察御史十八年轉掌山西道十九年巡視西城轉京畿道二十年京察一等記名以道府用轉掌京畿道遷刑科給事中嘗條奏臺灣應辦事宜又奏懲漳泉械鬪禁洋藥入口並內地栽種罌粟均飭議施行尋授甘肅甘涼道二十三年因在京時查庫失察庫銀虧短呈吏議削職回籍旋以主事起用歷主清源玉屏紫陽

閩侯縣志

六九

列傳五下

二十四

鼇峰各書院講席時羣盜蠡起大府延辦本省團練事平晉員外郎贊延平軍回適松溪浦城政和三縣相繼陷賊省會戒嚴重以錢荒米貴亂民藉端鬨節署栢蔭亟挽將軍輕騎出諭解之敘防勦延平功升郎中團練事竣賞花翎三品銜同治元年召赴安慶軍營二年授江蘇糧儲道旋擢按察使以蘇州克復辦理善後出力賞二品頂戴五年擢布政使護理巡撫議請覈減蘇松太三屬漕額三分之一常鎮二屬十分之一並請蠲緩被兵各縣民欠漕糧以太倉州及鎮洋縣之劉河年久失修復請借欸挑浚均如議行六年擢廣西巡撫旋調湖北仍留署蘇撫江浙間有槍匪者初以小船攜火器在太湖一帶打捕水鳥名曰槍船後漸聚爲匪卜小二其魁也父子稔惡官兵勦辦多年迄未獲栢蔭會同浙撫捕寘之法行旅以安六年冬赴湖北撫任尋署湖廣總督時值各省遣散營勇會匪黨布黃梅武穴龍坪各水次阻截散勇逼令從亂栢蔭飭水陸營弁分途查拏匪首蕭朝翥圖竄河南其黨殺之以降乃於武漢襄樊地方設遣勇局飭

屬稽查保甲凡有在鄂散勇均令赴局報名酌予資遣押送回籍俾免饑寒流爲盜賊京山蘄水沔陽教匪復嘯聚皆勦平之八年卸署總督回巡撫任夏秋霖雨湘水建瓴而下川水襄水並漲武昌漢陽黃州安陸荊州各府屬州縣隄垸潰決田廬淹沒節屆秋分水仍漫溢栢蔭遴員分帶錢米前赴被災名屬先辦急賑一面奏請於應解京餉及稅釐項下撥銀三十萬兩俾充賑費兼辦隄工疏入報可全活災黎無算九年復署湖廣總督十年湖南會匪糾黨連陷益陽龍陽兩縣栢蔭飛飭岳州鎮派船赴澧州防守又飭宜昌鎮及荊宜水師分段防堵並咨請湖北提督郭松林駐軍荊州相機進勦旣而該匪回竄桃花江一帶經官軍分路環攻擒斬首要地方肅清旋卸署督十二年湖北各屬被水復疏請蠲緩新舊錢糧旋以疾奏准開缺子式昌方守浙之湖州就養焉光緒元年回里再主鼇峰講席生徒日眾初咸豐紀元文廟燬於火栢蔭出倡修躬董其役殿廡重新至是明倫堂崇聖祠又圯復集貲修建之又增置文廟祭器每屆丁祀

先期集諸生演習禮樂佾舞生平廉俸所餘悉以置祭產調族戚自奉檢樸如儒素九年重游泮水十年正月薨賜祭葬國史立傳子六長卽式昌次兆昌刑部員外郎重游泮水三名昌光緒壬午科舉人湖北直隸州知州四傳昌甲午科進士五贊昌生員六懋昌

式昌號穀齋先用軍功得知府咸豐己未始舉於鄉需次浙江廣東巡撫蔣益澧調佐戎幕權肇慶府事識拔鄭紹忠於罪籍中後卒爲名將旣而以直去戊辰至浙署温州府再署湖州旋移台州黃金滿者盜而黠者也恆依山阻隘恣爲攻剽恒以官吏貪酷狀煽其醜式昌單車至以嚴法繩蠹吏蠲斥苛斂與民休息金滿無所藉口乃詣長江提督彭玉麟投誠玉麟委式昌往簡其眾至賊液人葭飲之左右疑有毒肘使勿進式昌若弗省者盡之賊大感動遂受編隸玉麟部下式昌嗣是歷權杭州金華府事癸巳題補台州府知府甲午以海運北上護理糧道旋省檄權處州未至更湖州丙申始蒞台州於是蒞湖三蒞台再矣台固盜藪式昌獨靜鎮無

擾盜亦不作台人稱曰郭佛戍戍復以疆臣薦晉道員庚子義和團起衢州奸民亦煽動既殺教士殲及穉弱外人大鬪將勒兵搗杭城是時東南方立互保之約兩江總督劉坤一移文問狀大吏始取爲亂者刑鞫於府治然外人責禍首急衢人益潛煽不已大吏以式昌民望移爲金衢嚴道鎮之檄下親故咸止式昌式昌曰居官有所趨避孰任其難者卒往諭士民令安堵購首要釋株連不旬日罪人遂得甲辰冬署按察使以積勞病卒年七十六爲人靖默被服寒素晚亦重游泮水子七人曾忻自有傳曾準壬辰進士知江西新建縣候選知府曾程己丑進士知江蘇元和縣曾鈞長蘆運判曾法議敘鹽大使曾量曾轍俱庠生

林鴻年字勿邨道光十六年成進士廷試對策進呈擬第三宣宗拔第一授翰林院修撰十八年充冊封琉球國正使卻讌金禁隨從帶貨勒銷二十年充山東鄉試副考官歷充國史館協修文淵閣校理方略館纂修二十六年京察一等簡廣東瓊州府知府抵任後馭民以恩繩吏以法郡有

閩侯縣志

六九

列傳五下

二十六

瓊臺雁峰兩書院爲廣購書籍增給膏火二十九年護雷瓊道海盜連艘逼海口奪師船鎮協鳧逃鴻年檄健弁黃開廣吳金美等面授機要引與岸戰盜投誠儋州匪人劉文楷勾引黎人圍城擄掠復募勇勦平之咸豐九年簡雲南臨安府知府同治二年擢雲南按察使旋補雲南布政使三年授雲南巡撫時滇及川黔三省賊匪充斥奉密諭與駱秉章勞宗光悉心酌度通籌全局迅赴昭通妥爲辦理鴻年奏陳籌度辦滇之法奉諭所陳自係實在情形著卽咨商四川湖南各督撫妥籌會勦其滇黔邊界卽以劉嶽昭任之峩邊馬邊民勇卽酌募精壯認真訓練所需軍火由川省借用儻滇省機有可乘卽可相度進勦永北廳失守情形著查探明確一面飭令派出各員赴大姚元謀永北一帶激勵團練防其北竄入川鎮雄與川黔相錯逼近昭通土苗各匪嘯聚自應迅圖廓清方不致阻塞由昭通一帶進兵之路現在李延忠節節進勦擒獲賊首卽著責令該署牧乘此聲勢逐節清釐始終出力卽由林鴻年酌覈請犒該州附近土匪多係

雲貴四川三省邊界之人自須會商勦辦卽著與駱秉章勞宗光張亮基妥籌辦理鴻年又奏前摺所陳先靖黔匪係因黔事孔棘亟宜湘蜀合攻臣仍專任辦滇故有另籌三五萬兩按月接濟之請現滇省軍務實有不宜再緩之勢非有大兵未容輕試昭東邊壤未可先任糜爛楊盛宗雄長一方與臣常通消息尙可令其出力但無餉項令亦不行現各路委員請餉紛紛均無以應查東征餉銀每月不止十萬兩可否飭下該省令每月撥銀三萬兩合前請撥湖廣釐金每月可得五萬之數如果得此餉力臣卽當前往川滇邊境督飭文武先辦各匪以待大兵似爲得計奉諭滇黔兩省軍務均關緊要現在迤東渠魁授首官兵正宜乘此機會專攻迤西回目楊振鵬擅攻臨安馬如龍等權勢日張亦宜分別勦辦裁抑林鴻年自宜速集兵勇進紮昭通籌辦軍務以資控制並著駱秉章遵照前奉諭旨於劉嶽昭唐友耕所部酌量抽撥數營交林鴻年帶往滇省所需餉銀亦由駱秉章酌量緩急撥解所請東征局每月撥銀三萬兩已諭令官文

撥餉太少不敷進取臣若久居川地徒負畏葸之名私心所不甘受若輕蹈危機入險無能自脫朝廷亦不忍聞請飭川省先籌撥銀數萬兩仍按月接濟俾利軍行並稱前此曾國藩遵旨議奏有川省專力濟滇之請並議以川督駐敘爲滇撫後路策應誠以疆臣宜不分畛域今各省協餉寥寥川省復多方推諉深虞貽誤大局奉諭劉嶽昭唐友耕兩軍餉項雖由川接濟而林鴻年已紮敘州待餉尤亟著崇實駱秉章仍按月妥籌接濟不得以先行籌撥二萬兩遂置滇餉於不顧各省勸捐欠餉各欸並著林鴻年分別咨催鴻年又奏請先撥階州得勝楚軍進紮昭通待餉奉諭催令迅速進兵鴻年探知迤西賊匪習槍礮兇暴尤甚復奏調蘇撫李鴻章所部總兵李恆嵩酌帶洋槍隊入滇委用前驅已入滇境正飛檄邊軍剋日馳赴東昭相機調度以崇實駱秉章會奏鴻年招撫滇匪李開甲等該匪藉詞投降意圖混入川境又札委李宜太回湘募勇在途招搖滋事五年正月奉嚴旨革職先是鎮雄土匪頭目李開甲等求角奎墟場紳耆聲

閩侯縣志

卷六九

列傳五下

二十八

請從征大理鴻年並未之許湖南副將李宜太爲駱秉章保升赴川投効之員川藩江忠濬稱其奮勇鴻年准留滇營旋假回募餉沿途捏造檄文諸多妄作經鴻年糾參並分咨川楚查辦有案竟以此罷歸主正誼書院講席訓迪舉貢務儲館閣之才光緒四年由地方官以掌教多年著有成效會奏復以經術湛深品行峻潔奏特賞三品卿銜十一年十二月薨年八十有一十三年奏准國史館立傳子四最最少傳在文苑

沈葆楨

鄉榜原名振宗

字翰宇一字幼丹父廷楓傳在儒行道光丁未成進士選

庶吉士授編修咸豐四年改御史時侍郎曾國藩帥師克武昌有旨命署湖北巡撫葆楨奏曾某躬典水陸軍宜乘勝東征不當羈以吏事疏上詔別簡巡撫文宗手勅報曰朝廷早見及此也葆楨以賊所過無不殘破疏請令州縣吏主兵而責以戰守部格不行五年出知九江府郡久淪於賊國藩檄充營務處六年署廣信府當是時江西列郡皆賊踞會城外惟贛州及廣信僅存詔學使廉兆綸典信防廉赴郡屬之河口籌餉以葆楨從

別賊楊輔清率黨萬餘自吉安破新城瀘溪金溪連陷貴溪弋陽防軍敗潰廣信岌岌葆楨兼程返郡則城門洞開官吏軍民走且盡妻林氏故總督則徐女也盡遣其子女僕婢獨堅留以俟葆楨已而葆楨至總兵饒廷選領浙軍駐玉山閩人也葆楨未歸時林氏作書乞援饒許之然恐無及忽大雨驟漲饒軍登舟半日至先是賊謀至巷無居人歸告其酋謂此囊中物耳賊亦避雨興安留一日詰旦薄城則旌旂遍樹城上賊氣沮斬謀者悉銳圍攻遊擊賴高翔畢定邦等啟城決戰凡七捷斬馘近千賊遁曾國藩以城守狀上聞七年遷廣饒九南兵備道加按察使銜留筦信防賊數犯貴戈又從閩中出犯廣豐玉山葆楨聯絡客兵擊走之賊圍衢州數月卒不敢犯江境安仁馬家村地險惡奸民負固稱亂葆楨帥練勇討之卒奪其隘火數十家村民縛首犯以獻立誅之大吏忌之甚遇事掣肘葆楨以親老乞養歸十年詔葆楨仍管廣信防務尋補贛南兵備道幫辦江西全省團練以親老辭十一年冬詔赴國藩安慶大營辦理軍務同治元

閩侯縣志

六九

列傳五下

二十九

年正月抵甌寧奉旨超擢江西巡撫卽赴新任葆楨馳泣任疏陳俟大憝就戮再申前請歸養當是時杭州已失守吳越賊聯爲一氣曾國藩駐軍皖南軍餉仰給於江西左宗棠方爲浙撫由江規浙而僞王李世賢楊輔清等席方張之勢畢力犯江西冀斷皖浙餽道葆楨躬赴廣信督防教士民以堅壁清野捐廉俸千金倡築塞堡賊黨分途竄擾葆楨利用湘人激厲主客各軍若江忠義之精捷營劉典之克勇道員席寶田之精毅營督糧道段起之衡營道員王文瑞之老湘營王德榜之長左營屈蟠張岳齡之平江營知府王沐之繼果營參將韓進忠之韓字營劉勝祥之祥字營臬司劉于尋之水師並遵調遣所嚮克捷元二兩年悍酋黃文金李遠繼古隆賢賴裕新等以皖浙乏食分踞廣饒邊境先後爲諸將所敗當軍務方殷適有法蘭西教堂被毀之獄嚴旨詰問主名葆楨疏稱事繇公憤萬眾同心總繇量臣疏於防範所致自請嚴加議處並言若必懾以兵威則背城借一惟天所授勝負何常詔置不問外夷亦無如何三年江寧賊勢

蹙分竄新城南豐建昌撫州及德興樂平玉山弋陽等屬葆楨皆遣將擊走之六月官軍拔江寧江軍亦克崇仁雩都肅清廣信府境會江寧逸賊僞侍王李世賢僞康王汪海洋等繇湖州越廣德分道竄入江西提督鮑超率所部來援豐克金谿南豐新城而僞佑王李遠繼僞玕王洪仁玕僞恤王洪仁政等擁僞幼主洪福瑱竄至廣豐鉛山豐爲諸將所敗福瑱鬚髮潛逃經席寶田追至石城之荒谷擒之詔賞葆楨頭品頂戴一等輕車都尉葆楨推功諸將疏請收回成命溫諭不允復以親病求開缺仍不允四年請假省親抵里已丁母憂撫江三載謂亂源所導由乎吏治不飭故於嚴繩驕兵悍將外懲猾吏尤力中因籌餉事與曾國藩大有違言至詔引廉藺寇賈故事和解之六年在藉奉旨充總理船政大臣船政之議發自左宗棠宗棠由閩督西征謂非葆楨莫肩其任疏辭不獲請俟服闋後出而任事語在通志船政志中居亡何而有巡視臺灣之役語在通志外交志中臺地孤懸海外舊設一府三縣二廳隸於臺灣道其臺北生番未

入版圖也至是葆楨乃請仿照江蘇巡撫駐蘇州例令福建巡撫移駐臺灣兼理學政疏陳十有二便得旨先行遂分南北兩路開山添建恒春縣於琅璦爲前明延平郡王鄭成功疏請予諡建祠以作臺民忠義之氣許之臺灣郡城經風雨坍塌千餘丈疏請修築並建礮臺於安平海口光緒元年奏設臺北府隸縣三曰淡水曰新竹曰宜蘭其噶瑪蘭通判則改爲臺北府分防通判移駐雞籠山又請將原駐府城之南路理番同知移駐卑南駐鹿港之北路理番同知移駐水沙連各加撫民銜以資控馭疏陳營伍積弊請概歸巡撫節制以一事權又以臺北產煤請購外洋開煤機器以興長利並請減煤稅詔皆如議行七月疏報凱撤淮軍而總督兩江之命下葆楨疏辭不允是年十月莅任地方興革則有修河堤行海運緩開關籌積穀拔罌粟減賦則禁民間厚殮增書院餐錢諸政整頓鹽務則有規引地清老堆浚鹽河諸政江海防務則有請緩裁營之疏合操兵輪之疏議覆礮臺之疏歸併旂昌洋行買斷鐵路之疏而皖南宣城寧國廣

德諸教案尤交涉之棘手者終能力持公道恢服羣情朝廷既雅重葆楨張弛所宜疏上輒報可淮徐等屬土瘠而俗曠悍越人於貨日數起亂後尤甚葆楨主治亂國用重典之義利用武健遇案外結不報論殺者相枕籍劫盜用一清以五年十一月初六日薨於位年六十遺疏惓惓於鐵甲船一事讀書不務淹博經史名言約守一二語終身用之無窮故義有不可者毅然見於詞色廉俸所入隨手散給族戚輒盡屬吏有乞某鉅公書繫援者鉅公謝曰若人雖政府諸王無以私挽者卒之日不名一錢遺疏入追贈太子太保入祀賢良祠政績宣付史館賜祭葬予諡文肅子七人長瑋慶附貢生欽賞舉人襲一等輕車都尉世職後一年以毀卒次瑩慶附生賞主事官湖南候補知府次璘慶光緒戊子科副舉人官江蘇知府次瑜慶光緒乙酉科順天舉人賞主事官至貴州巡撫次璿慶特用光祿寺署正次瑤慶附生特用主事次琬慶附生官江蘇道員孫十三人長翊清

閩侯縣志

六九

列傳五下

三十一

翊清字丹曾號澄園少孤以邑諸生從事船政局光緒九年承襲一等輕車都尉世職十年充船政總稽查旋就職同知十五年舉於鄉旋因三屆出洋學生期滿以勞奏保知府儘先選用並加三品銜旋以知府分發江西試用鋼甲兵艦告成詔以道員仍留省補用並加二品頂戴二十二年青州石隴成經船政大臣奏稱在事最久出力獨多請送部引見得旨發往四川儘先卽補並交軍機處存記船政大臣奏留充船政提調旋經四川總督奎俊奏派赴日本閱視兵操著有東遊日記二十八年命以四品卿銜充會辦四川礦務商務大臣准其專摺奏事將軍景星以船政關係重要復奏留閩省會辦船政船政自歸疆臣兼管日以不振廷議乃由南北洋協欸大舉造船因以重貲約洋匠既而議變洋匠執前約自貸貲庀材負債至數十萬泊翊清受事疏請攬造商船又請飭沿江沿海各大吏製兵艦必歸閩廠爲積贏完負散遣洋員計摺上報可張之洞陶模見其疏歎賞之遣員來議造船事時有主以廠歸商之議者已遣使游說南洋

羣島華僑集巨貲翊清爭之力事乃寢庚子北方有事閩濱海人心惶惑翊清練工團以兵法部勒之以戒不虞二十九年交卸船政差使調入練兵處行走三十三年六月陸軍部奏保以丞參記名七月奏派考查直隸山東山西陝西河南荊州江蘇江西八省旗陸軍學務所至按堂聽講分科校藝短衣匹馬馳驟於風雪烈日中積勞道病猶勉力支持跋涉長途照章查考不稍懈三十四年四月事畢返京疾遂不起年四十有八陸軍部以聞贈內閣學士銜閩浙總督松壽復陳翊清宣勞船政狀特旨宣付史館立傳子覲平優貢生候選知縣覲宸舉人記名御史覲宸官外交部覲冕福建鹽運使珂海軍陸戰隊團長

吳仲翔字維允咸豐己卯舉人報捐訓導辦理團練出力選授興化府學訓導改授南平縣學莆田縣學同治六年由船政大臣沈葆楨調赴船政局辦理文案提調等差最稱得力十三年報捐選用道員嗣歷經奏獎於光緒元年船工告成案內以道員儘先選用並加三品銜勦服臺灣番社

閩侯縣志

六九

列傳五下

三十一

案內賞加二品銜五年臺灣後山三次剿平番社案內以道員分發省分補用五年三月代理船政大臣事務七年四月直隸總督李鴻章以天津開辦學堂事關緊要奏調在津差遣總辦水師學堂練船事宜辦有成效十一年署船政大臣裴蔭森奏委船政提調差十三年兩廣總督張之洞調粵奏委總辦水陸師學堂事務十七年補授肇陽羅道署按察使未幾卒

趙新字又銘咸豐壬子進士改庶吉士六年散館授職檢討充國史館協修纂修總纂提調日講起居注官文淵閣校理教習庶吉士記名御史九年以臣工列傳告成賞加侍讀銜充己未科江西鄉試副考官同治元年京察一等充壬戌科廣西鄉試副考官三年京察一等記名以道府用是年以補繕宣宗實錄告成奉旨記名遇有道員缺出簡放先換頂戴四年充冊封琉球國王正使升授詹事府右春坊右贊善五年轉左贊善以皇清奏議文武職大臣年表告成賞加三品頂戴六年京察一等補行引見

奉旨仍交軍機處記名遇有道員缺出簡放十月奉旨補授陝西督糧道時回寇未平關隴之間流亡載道新視事後撫綏安緝居民稍稍復業數年之間田畝豐收倉庾充實而餼糧芻茭之備所儲爲西征用者咸無缺於供西安關中書院本屬糧道經管舊規每月有古學課軍興以來不免廢弛新以書院爲造就人材之藪特捐廉獎賞課卷必親自評閱遇有沉潛好學之士輒加獎勵風氣因之以振秦士於音學素欠講求每課詩賦韻多失叶新必詳爲指示以肝疾目疾時起方擬引退而史局同官譚鍾麟擢任陝藩旋視撫篆堅留不聽去至丙子疾益劇乃決歸里抵家甫十日而卒其在陝也修龍洞渠灞橋等處倡捐鉅款工賴以濟

陳欽銘字少希以舉人援例爲工部主事考充總理各國事務衙門章京同治七年會試成進士以原班用海疆巡道例選章京資之深者爲之以其嫻於時務也欽銘在總署爲恭親王文祥沈兆霖所倚任令主譯署管鑰力辭益爲所重尙書常熟翁同龢壽州孫嘉鼐密薦之補屯田司員外郎轉虞衡司郎中出爲江蘇常鎮通海兵備道勤吏事察夷情釐剔稅務積弊光緒十年法越構衅警報日數至民情洶懼以鎮定處之市廛安堵署江蘇按察使旋即眞其冬以脛疾假歸省垣善舉如育嬰敬節修貢院皆捐金襄助會推擇出使英法義比各國堪膺大臣選者就家徵之以舊疾未愈具摺懇辭踰年卒

郭曾忻原名曾矩字春榆號匏庵晚號遯叟又號福廬山人祖柏蔭父式昌已有傳曾忻光緒庚辰成進士改庶吉士癸未散館用主事分禮部隸儀制司與修會典然趨曹無間吏憚其精覈辛卯補本司主事癸未充軍機章京擢員外郎掌本司印樞軸倚重草詔外兼諮大計稍遷郎中三次京察一等當外簡皆未果戊戌變法特命楊銳等爲章京參新政同直咸側目曾忻獨處之坦然是冬擢內閣侍讀學士逾年轉太常少卿擢光祿卿蓋樞相某隱爲薦引旣而風示欲致門下曾忻曰受爵公朝拜恩私室吾不敢也庚子拳亂作翰林某請駢誅大吏將由樞府領銜代奏侍御某

請派義和團搜查內外城官宅奸細曾忻皆力言於樞臣寢其疏知交南歸者寄存西籍或慮貽患請燬之不許未幾聯軍陷京師兩宮西狩扈從弗及乃南下省親於浙既而馳赴行在授通政使仍直樞廷時創設政務處畧仿宋之制置司曾忻爲提調凡條奏新政者次第議行一無閼滯回鑾扈蹕每於行帳中草詔逾夜午抵都叙勞當優擢力辭特詔予侍郎銜旋署工部左侍郎調禮部右侍郎兼戶部左右侍郎樞直如故其時直隸督袁世凱握兵柄權勢日盛嘗自請兼領山東榮祿以諮曾忻曾忻曰往在康雍雖有是例非此時所宜援慮養成外重議乃寢故事章京謁長官皆長揖某邸由譯署兼長軍機同僚將依譯署例行屈膝禮曾忻執不可某邸憾之乙巳丁父憂服闋有見於國是多紛亂萌不靖因疏陳五事曰信詔令曰籌大計曰挽積習曰融成見曰明學術各云云疏上兩宮覽之動容是日侍郎懸缺者三命擇一以畀某邸沮之乃授郵傳部左丞旋署右侍郎復調禮左次年始補禮右曾忻曰禮官雖散地然邦紀繫焉吾以

舊曹郎致此曷敢不勉先是光緒初奏請從祀文廟者閣學陳寶琛以明儒黃宗羲顧炎武孔學政祥麟以明臣王夫之皆格於廷議至是朝士復有疏請者下部議覆異議紛然曾忻反復辨論大學士張之洞在樞廷主持允力卒得邀允許侍郎景澄袁太常昶與徐尙書用儀立尙書山聯閣學元同以庚子抗議罹刑褒諡猶闕曾忻懇切陳請乃有旨予諡舊制丁憂去官三年滿員則以百日畫一服制議起尙書溥良將強漢從滿禮侍同邑張亨嘉爭之累月不決曾忻再莅部具疏草千餘言援據經史發六不可之論溥良無以難卽合詞入奏於是滿漢居憂者皆去官持服三年著爲制張之洞語人曰百年以來禮臣能舉其職者一人而已辛亥改設典禮院授副掌院學士旋署掌院學士遜政詔下迄於交替典守一無所失壬子京津兵變被劫家具蕩然僦居一椽敝衣菲食安之若素先於宣統初元充實錄館副總裁癸丑復同陳太傅寶琛勘修清德宗本紀督勵館員正其訛佚經費無出筆札皆自備書成先後叙勞賞頭品頂戴紫禁

城騎馬加太子少保銜晉太子太保銜嘗致書當道請仿歷代衍聖公及歐洲教皇例確定遜帝尊號永遠承襲不省戊辰十一月病卒京寓春秋七十有四贈太子太保易名曰文安光緒癸卯典山東鄉試宣統庚戌主舉貢會考所得皆知名士經濟特科覆試進士館留學畢業考試優拔貢朝考以及考試試差御史中書咸與閱卷殿廷考試久尙楷法曾烝獨重實學恆有違式小疵拔自落卷者甲午後覩朝事日非有慕於同巷龐光祿鴻文之退隱因署所居曰愧龐庚子以國步方迍朝命諄迫義不得引退復署軒曰再愧自經史以逮漢宋學說佛老家言靡不探究史記通鑑文選唐宋以來名家詩方姚梅曾諸家文咸有批錄本少壯所爲詩多散佚晚邁世變憂憤一廡篇什已梓者亥既集徂年集雲萍簾藁匏廬賸草再愧軒草及讀杜札記一卷樓居雜記一卷邴廬日記若干卷聞見至博都下考舊聞者必就正焉子四則澧光緒癸卯進士翰林院編修頭品頂戴記名提法使署浙江提學使養剛北洋大學畢業生賜進士翰林院庶

閩侯縣志

六九

列傳五下

三十五

吉士則濟二品廕生民政部主事則漢殤孫八人

張亨嘉字燮鈞一字鐵君同治乙丑舉於鄉自是困禮部試幾二十年用以肆力於學閩浙總督左宗棠創正誼書院課舉貢爲詩賦四書文福建巡撫王凱泰創致用堂課經義治事亨嘉試常冠其曹光緒癸未始成進士改庶吉士丙戌授編修命提督湖南學政試一府治經古場分經史小學輿地掌故兵謀算術詞賦二三十門發題百數十道治經者分習各經又分今古文若詩齊魯韓尙書歐陽夏侯伏馬鄭諸家也一府治試二三十日日坐堂皇傳餐不入內夜閱卷往往達曙名第上下旣鱗次排比猶斟酌一二字句分寸短長數移置之不使小有顛倒委屈鄉試號舍厯萬有奇應試者萬七八千人學使者錄取遺才府縣學生當十擯其三大學生當十擯其四去取尤兢兢較毫釐矣癸巳典試廣西充正考官徧撈遺卷拔取以十數辛丑提督浙江學政時方改四書義策論試士以淹貫有特識爲主其能發揮新學者薦舉經濟特科及咨送京師大學堂爲師範

生在湖南倡捐廉俸增益校經堂肄業名額杭州舊有藏書樓亂後書無一存新而大之購書七萬卷刊定士民借閱規條學問喜博大而惡苛碎其遊覽山水評品書畫亦然桂林陽朔山水昔人稱奇獨以爲細碎不足喜喜司馬氏通鑑首以教人謂明季清朝諸儒若黃氏宗羲王氏夫之顧氏炎武胡氏渭顧氏祖禹顧氏棟高所著書皆裨實用爲文章開朗詳盡不屑屑爲含蓄吞吐以取姿態嘗作座師故大學士張之萬神道碑中述豫軍戰事數千言翔實地形以究東西捻就殲之勢見者皆以爲他人莫能爲也由編修入直南書房升授國子監司業遷詹事府右春坊右中允升授司經局洗馬遷翰林院侍講升授太常寺少卿遷大理寺少卿由浙江學政回京奉旨著仍在南書房行走並充京師大學堂總監督補授光祿寺卿遷都察院左副都御史升授兵部右侍郎調補禮部左侍郎充玉牒館副總裁經筵講官其爲總監督也耳食東西國學制者方謂講席當檄委講師當爲屬吏亨嘉不謂然走書幣四方禮聘儒宿或請至四五不

閩侯縣志

六九

列傳五下

三十六

倦雅護學生而譎觚肆慢者必繩之近歲改官制貳列曹者事至不敢有可否亨嘉貳禮部核議顧黃王三儒從祀文廟奏設禮學館草創規模有所異同辯論斷斷至面發亦不止戊申歸里議遵奏案設存古學堂手訂章程數十紙興辦有日亨嘉入都有梗其事者遂中止癖嗜書畫收藏多本朝名家大小千百事宋元人僅百一二以爲歲月綿漉非來歷真碯者不敢有也然數十年廉俸所入盡於此矣少孤無昆弟官京師湖南浙江皆奉母偕行無閒溫清戊戌命出使朝鮮以親老疏辭庚子兩宮西行母年已九十不能棄奔行在所疏陳引咎兩宮優許之體素厚重冬春多痰以宣統三年正月二十日無疾痰湧遽薨享年六十有四予諡文厚子如宣賞主事

沈瑜慶字愛蒼父葆楨自有傳瑜慶因營葆楨賜祠於省垣烏石山購許友濤園別墅因自號濤園讀書專喜左氏傳檀弓庾開府哀江南諸賦杜詩蘇詩吳梅村七言古詩行坐背誦餘不屑措意留心當代掌故翻閱一

時曾胡諸巨公奏議學爲章奏書牘下筆動千百言嘗論中興諸功臣類闡海國情勢恐遺他日之悔獨郭侍郎嵩燾丁巡撫日昌明達喜言外事方見排清議可惜屢言葆楨葆楨躓之舉二人自代光緒元年葆楨督兩江瑜慶隨侍餼聞軍務吏事及江南利弊己卯葆楨卒瑜慶恩賞主事入都謁選乙酉中順天鄉舉丙戌簽分刑部庚寅以道員改官江南委辦水師學堂辛巳劉坤一督兩江委辦宜昌鹽局往來鄂渚時督部南皮張之洞按察使新寧陳寶箴皆好士名流畢集時與文酒之會甲午日本構釁之洞移督兩江檄隨節詳詢江南應興應革諸務條陳甚宓總督署文案兼籌防局營務處時南北徵調餉械文書旁午延接諸將領僚屬昕夕不遑海軍旣燿領艦者率南奔瑜慶以皆葆楨舊人言之洞分別留置使自效後庚子之變言於坤一者亦如之用稍收餘燼保聚於南紀方聯軍之入京也兩江總督劉坤一湖廣總督張之洞倡東南互保之約瑜慶奔走參與其議辛丑秋補淮揚海兵備道辦學堂興市政設農事試驗場修馬

閩侯縣志

六九

列傳五下

三十七

路以達板浦護理漕督兼淮安關監督癸卯升湖南按察使未到任授順天府尹奏請修京城道路並釐定度量衡制度時日俄構釁京師浩穰一切督奸倚步軍統領瑜慶自請募騎步編隊各一營督捕治近畿盜賊斂迹簡山西按察使未到任調廣東丙午升江西布政使丁未護理巡撫兩江督端方以賑務爲名欲提贛藩及關糧庫欸據例駁之贛州有戕教士毀堂之獄江督欲移軍剿辦瑜慶急奏止極陳不煩用兵狀廷旨責成議結遂無事按察使瑞澂欲提案在滬議結新任巡撫馮汝驤欲提庫欸辦貢品瑜慶均峻拒之於是比而嗾言官中傷之遂罷去入都數月乃簡貴州布政使調河南升貴州巡撫辛亥革命軍起引疾歸僑居上海憔悴皤然遽成一老一時海內遺老多羈於滬瑜慶朝夕過從恃以遣日以戊午九月胃病不食數日卒年六十一予諡敬裕晚喜爲詩丙申權鹽皖岸及正陽關與同里陳縣令書女夫林京卿旭日課一詩不數月成正陽集一巨冊後併爲濤園集

陳季同字敬如同治閒肄業於船政前學堂習法國語言文字歷經甄別皆冠其曹拔充辦公所繙譯癸酉朝議擬派使駐西洋各國然不知匡略須先遣人往探令船政大臣沈葆楨舉其人眾皆憚風濤季同獨請行遂保以都司偕洋員日爾格遊歷英法德奧四國與彼都人士周旋晉接悉合窺竅明年歸著有西行日記四卷升參將並加副將銜光緒乙亥政府派李鳳苞充出洋肄業局監督以季同爲舌人帶領駕駛學生劉步蟾林泰曾製造學生魏瀚陳兆翱等同往季同自兼習英德羅馬臘丁各種文字尤精熟於法國政治並拿布侖律雖其國之律師學士號稱老宿者莫能難已而鳳苞任駐德法使者季同爲繙譯官陞副將加總兵銜船政又派出洋學生二十餘人季同仍兼出洋局繙譯旋升駐德駐法參贊代理駐法公使兼比奧丹荷四國參贊以法文譯中國禮教並小說等書刊於巴黎西國文學之士無不折服朝廷屬有交涉疑難事皆飭使者委令辦理無不得當甲申中法之役將啟釁飭季同由德之法與議分越南地以

紅河爲界事將成曾襲侯紀澤聞而爭之遂啟戰並紅河北岸數百里之地亦不可得舊例出使三年恆得一過班保舉季同由副將而總兵而提督已奉旨依議忽兵部有書索鉅金弗與遂創非戰功不得保總兵提督例仍爲副將季同嘗默計各省所借外債爲數甚鉅息約六七釐八九釐不等若合借一家年可減息銀數百萬金條陳於李鴻章鴻章韙其說適醇親王奕譞當國鴻章以告擬移此欸創盧漢鐵路令季同成其議往返奧比與其富商訂明息四釐每百實收九八五蓋西人借款兩家中潤五分均分若脂膏不潤則國家收數較多草約成奕譞殂事中止薛福成奉使英法有慶常者窺季同位以飛語陷之謂於此項借款有利薛心動季同答言此事卽成我亦無利况未成乎乃請告歸薛意未已電閩督拘之季同弟壽彭入都營救總署詰薛薛撫季同無關緊要事劾之令北洋訊問旋得白復官留北洋辦理洋務及秋永定河洪水崩北岸京畿震恐以壽彭習水學建築法北洋檄季同兄弟測繪水勢議於盧溝橋築堤減水

一枝通大清河甲午夏告成七月中東事起季同進高麗地圖請守平壤險要之地因循弗果乙未春臺灣巡撫唐景崧請季同往署臺灣布政使擬以民政獨立遙奉正朔拒敵人謀初定唐無堅守志遽遁季同率駕時斯美等四輪船赴兩江呈繳僑居上海以文酒自娛西人有詞獄領事不能決咸取質焉爲發一言或書數語與之讞無不定其精於西律之驗如此西人梯航之來吾國者莫不交口稱季同嘗游齊魯登泰岱謁孔陵適李鴻章治河在魯留勸助季同著治河芻議言改堤束水刷沙之法甚詳因費鉅格不行庚子拳匪起京津各國紛電調兵季同曰事急矣爲今計南方數省建議中立先免兵禍著爲條陳由道員沈瑜慶上諸兩江總督劉坤一與鄂粵兩督合議東南互保之約遂成既而兩宮西遁滬上紳商議做紅十字會例救濟京津被難者而中國之船不得入戰地季同曰我在則行可無事爲發電告駐京各公使及主兵之酋西人聞季同名皆遵約束於是季同率救濟輪船懸龍旗直入大沽兩岸洋兵歡呼雷動而中

國避難士民麇集求援留月餘爲部署一切而返季同善文墨下筆不能自休而擊射槍礮尤精穩兼能馳騁在泰西十九年凡各國君長大蒐時咸延往較閱又時偕其將校會獵所獲較多閒居久鬱鬱不樂遂寄意於醇酒婦人在法國時娶法女賴氏無出有女博士蒨爽慕季同才隨至中國生一子取給奢季同不能應竟率子去復納妓李氏姊妹爲妾乙巳季同卒於金陵時主官報繙譯兩局也年五十有四每當譯書時目視西書手揮漢文客至皆延入坐各操方言一一答不誤所著法國書數種外有三乘槎客詩文集十卷盧溝吟一卷黔遊集一卷李氏遺腹生子曰璋林喬椿字濂孫幼肄業福州船政局後學堂畢業充北洋海軍號令官隨閱沿海諸省砲臺編輯旗燈通語廣東調充粵雅堂教員歲癸卯值桂林峒匪之亂廣督岑春煊督師征勦將發而東省沙匪潛煽黨徒盈萬器械充儲春煊知喬椿能將俾偕邱某委爲水軍兩分統附麗于提督李準未數月而巨寇如區新林瓜四一律就擒卒斃以法沙匪旣戢而峒匪之勢

亦殺春煊保喬椿與邱某爲補用知州時嫉者甚衆在粵歷著勞績如夷艇泰安之碰壞我船也則令其罰賠雷虎之完固美艦發安之自觸礁石也則出死力拯活百七十人之多會審緝私之利用船也則自以重價得他船日記爲鍊証力辯緝鹽者之非在英界外國艦雲南之碰沈我民間博船也往返香港挽他國人幹旋必令其賠償了結乙巳八月粵之惠州有王和順巨匪喬椿隨同李準圍捕一去兼旬有促製監造六小艦之公文至商廠攬工牽連幕府其明年秋春煊移督雲南嫉者遂不辨金磅前後年之起落銀紙毫相去之等差以邱某與喬椿監造船艦浮冒鍛鍊成獄召往營務處訊之嫉者競以危詞相聳喬椿性剛遂不自辨而自裁死之日各□保電如筍束已無及矣

葉伯鋆字鶴舫幼入船政水師後學堂肄業每試輒冠其曹比赴練艦實習凡駕駛測量槍砲諸術尤能各盡其長沈葆楨督兩江調爲登瀛洲兵艦艦長壬午韓京之役南北洋均派艦赴援伯鋆獨先入韓港甲申法人

閩侯縣志

六九

列傳五下

四十

擾沿海長江防務關係各省檄伯鋆領留防諸艦扼守江陰事平擢爲南瑞鐵艦艦長先後積資敘官至升用總兵旋補授吳淞營協鎮在任三年有奇適新艦告成調任建威建安兩快艦統帶未幾病卒有自治齋芻言一卷已刊行又英文航法指南一冊待刊子可樑留美農科進士歷任出使舊金山小呂宋各埠總領事官

林旭字暉谷號晚翠祖福祚傳在循史父百敬邑諸生旭少孤從塾師學爲律賦出語驚其長老喜瀏覽羣書家貧閱市借人人見其強記樂與之同邑沈瑜慶者以道員需次江南省墓歸異其博瞻以愛女鵲妻之贅於金陵從遊武昌徧識一時所謂名流若陳寶箴三立父子梁鼎芬蒯光典屠寄之倫歲癸巳旋里爲邑諸生旋領鄉薦第一闈作傳誦天下年十有九耳入都知名士爭與交試禮部不售則發憤爲歌詩取路孟郊陳師道苦澀幽僻識者以爲孟夏行冬令非所宜未幾中日構戰中國方大挫言變法者蠡起京師強學會興旭則入貲爲內閣中書與京僚張亨嘉等興

閩學會王儀通張元濟等興通藝學堂戊戌康有爲梁啟超方上萬言書
開保國會旭日奔走其閒既下第湖廣總督張之洞湖南巡撫陳寶箴皆
欲致之而中朝方令京外官三品以上薦舉人才翰林學士王錫蕃奏薦
旭召見特命與楊銳劉光第譚嗣同以四品御銜充軍機章京參與新政
日夜謀變更一切甚急欲盡斥耄老諸大臣舉用新進十日而難作矣初
那拉太后雖歸政景帝而用榮祿爲北洋大臣某爲步軍統領兵權固在
握也新進者亦知無兵不能有爲則請景帝調用袁世凱軍謀未成而后
聞之四章京就逮數日未具獄辭斬西市相傳旭獄中有絕句云青蒲飲
泣知何補慷慨難酬國士恩欲爲君歌千里草本初健者莫輕言千里草
指董福祥蓋少戇也死年二十有四無子有晚翠軒詩